

आकाशवाणी जयपुर—अजमेर
प्रादेशिक समाचार
दिनांक : 03.01.2026 समय : 18.45 बजे

- प्रधानमंत्री नरेन्द्र मोदी कयो— भगवान बुद्ध कानी ऊं दिखायी ज्या मार्ग अर ज्ञान पूरी मानवता सारु हैं
- राजस्थान डिजिफेस्ट टाई ग्लोबल समिट 2026 काले ऊं जयपुर मांय सरु व्हेलां
- लोकसभा अध्यक्ष ओम बिरला देश रा नुवा कानूनां लागू करण मांय वकीलां री भूमिका ने महताऊं बतायां
- प्रदेश मांय कमती रा तापमान मांय और कमी आवण रे साथे ई ठण्ड रा तेवर तीखा— माउन्ट आबू मांय पारो जमाव बिन्दु ऊं नीचे पूग्यों

000

प्रधानमंत्री नरेन्द्र मोदी कयो है के भगवान बुद्ध कानी ऊं दिखायी ज्या मार्ग अर ज्ञान सगळी मानवता सारु है अर उण रा पवित्र अवशेष फगत कलाकृतियां नी है बल्कि देश री विरासत रो अंग हैं प्रधानमंत्री श्री मोदी आज नुवी दिल्ली रा राय पिथौरा सांस्कृतिक परिसर मांय भगवान बुद्ध ऊं जुड्या पिपरवा अवशेषां री शानदार अंतरराष्ट्रीय नुमाइश री सरुआत करीं श्री मोदी कयो के भगवान बुद्ध रा अ पवित्र अवशेष भारतीय सभ्यता रा अभिन्न अंग हैं वणा कयो के एक सदी ऊं बत्ती लाम्बी बांट जोवण रे पछे अ अवशेष भारत आया हैं

.....

संस्कृति मंत्री गजेन्द्र सिंह शेखावत कयो के भगवान बुद्ध रा दर्शन भारत री अनूठी आत्मा रा दर्शन हैं

.....

रेल मंत्री अश्विनी वैष्णव आज देश री पहली वंदे भारत स्लीपर रेलगाड़ी ने देख्यां श्री वैष्णव बतायो के आ रेलगाड़ी रात री बगत अर लाम्बी दूरी री जातरा सारु डिजाइन करीजी हैं वणा कयो के भारतीय रेल री लाम्बी दूरी री जातरावां मांय ओ महताऊ सुधार रो प्रतीक हैं वणा कयो के वंदे भारत स्लीपर रेलगाड़ी तेज यात्रा, चोखा आराम अर आधुनिक हिफाजती प्रणालियां ऊं सुसज्जित हैं

.....

राजस्थान डिजिफेस्ट टाई ग्लोबल समिट 2026 रो आयोजन काले ऊं जयपुर मांय कर्यो जावें सीतापुरा रा जेईसीसी मांय 6 जनवरी ताई अ समिट व्हेलां सूचना प्रौद्योगिकी अर संचार महकमा रा शासन सचिव डॉ. रवि कुमार सुरपुर बतायो के इण मांय स्टार्टअप्स, निवेशक, नीति निर्माता, कारोबारी अर क्रियेटर जुटेलां वे डिजिटल एग्रीकल्चर स्मार्ट हैल्थ, स्मार्ट स्मार्ट इंफ्रास्ट्रक्चर, जल प्रबंधन टूरिज्म, वाटर गवर्नेंस, आर्टिफिशियल इंटेलिजेंस समेत कई खास मुद्दा माथे चर्चा करेलां ई दौरान स्टार्टअप पिच सत्र, सेक्टरल सेशन, हैकाथॉन, कॉमिकॉन, फिल्म फेस्टिवल अर राजस्थान रीजनल एआई इम्पेक्ट कॉन्फ्रेंस ई व्हेलां समिट मांय केन्द्रीय मंत्री पीयूष गोयल, अश्विनी वैष्णव अर जितिन प्रसाद समेत देश—विदेश री कई हस्तियां भेळी व्हेलां

000

निर्वाचन आयोग नागरिकां ऊं ईसीआईनेट एप ने चोखो बणावण सारु 10 जनवरी ताई सुझाव मांग्या हैं मुख्य निर्वाचन आयुक्त ज्ञानेश कुमार री अगुवाई मांय तैयार ओ एकीकृत ऐप पहला री 40 न्यारी—न्यारी निर्वाचन सेवावां जिण मांय वोटर हेल्पलाइन अर सी—विजिल ने एक ई प्लेटफॉर्म माथे लावे हैं ई एप री मार्फत मतदाता सेवावां, मतदान रुझानां अर इंडेक्स कार्ड छापण मांय तेजी आवेलां इण रो कामयाब परीक्षण बिहार विधानसभा चुनाव 2025 रे दौरान कर्यो जा चुक्यो हैं

000

लोकसभा अध्यक्ष ओम बिरला कयो के देश रा नुवा कानूनां ने लागू करण मांय वकीलां री घणी भूमिका हैं श्री बिरला आज कोटा मांय अभिभाषक परिषद कानी ऊं नुवी कार्यकारिणी रा शपथ ग्रहण जळसा मांय बोल

रिया हां वणा ई दौरान भरोसो दियो के नुवो न्यायालय भवन बेगो ई बणायो जाएलां श्री बिरला कयो के सगळा ने सस्तो अर सरल न्याय दिरावण री कोशिश व्हेणी चाहिजें

000

उपमुख्यमंत्री अर सैलाणी महकमा री मंत्री दिया कुमारी आज कोटा मांय तीन दिन रा 'हाड़ौती ट्रैवल मार्ट-2026' बी-2-बी नुमाइश री सरूआत करीं ई मौके वणा कयो के सरकार रो लगस जयपुर अर उदयपुर रे अलावा प्रदेश रा अनछुआ सैलाणी ठौडां ने बधावो देवणो हैं दिया कुमारी बतायो के कोटा-हाड़ौती हलका मांय चंबल रिवर फ्रंट, वाइल्ड लाइफ अर किलां जैस्सी केई मोहवणी ठौडां हैं अबे कोटा ने ग्लोबल टूरिस्ट डेस्टिनेशन रा रूप मांय विकसित करयो जावें वणा कयो के कोटा मांय एयरपोर्ट सरू होवण अर चोखा सड़क सम्पर्क ऊं अठे रुजगार रा नुवा मौका पैदा व्हेलां

एनसीसी कैडेट गणतंत्र दिवस शिविर 2026 मांय देशभर रा कुल 2 हजार चार सौ छह एनसीसी कैडेट हिस्सो लेवेला, जिण मांय आठ सौ 98 लड़कियां भेली हैं लारली साल री तुलना मांय सगळा राज्यां मांय बालिका कैडेट री तादाद मांय बढवार व्ही हैं नुवी दिल्ली मांय एनसीसी रा लेफ्टिनेंट जनरल वीरेंद्र वत्स कयो के जम्मू-कश्मीर रे साथे-साथे लद्दाख ऊं 127 कैडेट अर नॉर्थ ईस्ट हलका ऊं 131 कैडेट इण मांय हिस्सो ले रिया हैं वणा कयो के 25 दोस्त देशां रा कैडेट अर अहलकार ई यूथ एक्सचेंज प्रोग्राम रे तैत जळसा मांय हिस्सो लेवेलां

000

प्रदेश मांय कमती रा तापमान मांय कमी रे साथे ही ठण्ड रा तेवर तीखा व्हे गया हैं मौसम महकमा रा आंकडा मुजब घणकरी ठौडां तापमान सामान्य ऊं नीचे आय ग्यों माउन्ट आबू मांय तापमान लुढकने जमाव बिन्दु ऊं नीचे दर्ज व्हीयो, वठे ई मैदानी हलकां मांय सीकर सब ऊं ठण्डी ठौड रियो, जठे कमती रो तापमान 2 दशमलव 8 डिग्री रिकॉर्ड करी ज्यों राजधानी जयपुर मांय ई रात रा पारा मांय कमी ऊं ठण्ड बण्योडी हैं ई बीचे केई ठौडां संवारा घणा कोहरा रे कारण जिन्दगी माथे असर पड़्यो हैं मौसम महकमो आवता दो-तीन दिन राज्य रा केई ठौडां घणा कोहरो छाया रेहवण री आस जताई हैं आवता दो-तीन दिन मांय तापमान मांय एक ऊं दो डिग्री री कमी आवण अर उत्तराद हलकां मांय शीतलहर री आस जताई हैं राज्य रा घणकरां हलकां मांय आवता 48 घंटां रे दौरान बत्ती रो तापमान सामान्य ऊं दो ऊं पांच डिग्री सेल्सियस नीचे दर्ज होवण अर कठे-ई-कठे दिन ई घणा ठण्डा होवण सारू चेताया हैं

000

जयपुर नगर निगम कानी ऊं जैपर शहर मांय 26 रैन बसेरा चलाया जावेलां जिण मांय निराश्रित लोगां सारू रुकण, गर्म बिस्तर अर भोजन रा मुफ्त बन्दोवस्त करी ज्या हैं आयुक्त डॉ. गौरव सैनी बतायो के ठण्ड ने देखता रैन बसेरां री बरोबर निगे राख्यी जावें रात री बगत गश्त करने, खुला मांय सोवण वाळा लोगां ने रैन बसेरां ताई पूगाया जावें निगम लोगां ऊं अरज करी है के जे कोई मिनख खुला मांय सोवतो मिले तो निगम रा कंट्रोल रूम नंबर माथे तुरत जाणकारी देवें

000

जयपुर मांय पहली बार व्हे री आर्मी-डे परेड ने लेर पुलिस प्रशासन पूरी तरह अलर्ट मोड माथे हैं परेड री रिहर्सल अर खास आयोजन रे दौरान हिफाजती बन्दोवस्त मजबूत करण सारू पुलिस आयुक्तालय कानी ऊं दिशा-निर्देश काढी ज्या हैं आ परेड जयपुर मांय एनआरआई चौराहा ऊं बॉम्बे हॉस्पिटल व्हेता महल रोड ताई व्हेला, जिण ने लोग 9, 11, 13 अर 15 जनवरी 2026 ने संवारा 6 ऊं दोपहरां 12 बज्यां ताई देख सकेलां देखण वाळा रे बैठण सारू अक्षय पात्र मिन्दर सामी बन्दोवस्त करी ज्यो हैं महल रोड रा 5 किलोमीटर रा दायरा मांय ड्रोन उड़ावण माथे पूरी रोक रेहवेलां साथे ही रिहर्सल री बगत पतंग उड़ावण माथे ई रोक लगायी ज्यी हैं ड्रोन अर पतंग ऊं सेना रा विमानां री उड़ान मांय अड़चन अर बाधा और दुर्घटना की आशंका को देखते हुए यह कदम उठाया गया हैं पुलिस हादसा रा अंदेशा ने देखता लोगां ऊं अरज करीजी है के वे खुद ई ड्रोन अर पतंग नी उठावे अर आरे-सारे रा लोगां ने ई, ई सारू समझावें हिफाजत ने देखता कार्यक्रम री ठौड रे आरे-सारे रेहवण वाळा लोगां, किरायादारां, दुकानदारां अर फैक्ट्री चलावण वाळां ने कार्मिकां रो पुलिस सत्यापन जरूरी करावण रा निर्देश दीरी ज्या हैं ई बीचे, गृह महकमा रा अतिरिक्त मुख्य

सचिव री सदरत मांय आज एक ऊंचा थर री मीटिंग व्हीं बैठक मांय ईं आयोजन मांय बत्ती ऊं बत्ती जनभागीदारी तय करण माथे जोर दीरी ज्यों बैठक मांय जाणकारी दीरीजी के 9 जनवरी ने होवण वाली सेना दिवस परेड मातृशक्ति ने समर्पित करीजी हैं

000